

結爲昆弟，迫之東遷，又分遣副使使大宛、康居、大月氏、大夏、安息、身毒、于闐、扞罽（史記索隱：「扞罽音汗彌」按漢紀作「拘彌」，疑扞當作扞，扞、拘一聲之轉也。）及諸旁國。騫還，拜爲大行，列於九卿。後歲餘，騫卒；騫所遣副使通大夏之屬者，皆頗與其人以俱來，於是西北諸國始通於漢矣；此武帝元鼎二年（公元前一一五年）事也；漢亦置酒泉郡以統之，然是時張騫已死，但開通西域之跡者，自張騫始也。自張騫死後，益發使抵安息、奄蔡、黎軒、條枝、身毒諸國，使者相望於道。一輩大者數百，少者百餘，人人所齎操，大放博望侯時。使者既多，而外國亦厭漢幣，不貴其財物；而樓蘭、姑師當漢道之衝，負水擔糧，迎送漢使，頗以爲苦；常劫掠漢使王恢等。時匈奴日逐王盤據天山東麓，即今哈密、鎮西一帶，中無高山間隔，匈奴騎兵出入爲寇。設樓蘭與匈奴相結，即可阻漢使之通行。故漢爲防禦北虜，保障漢道之安全，不能不對於樓蘭加以注意。元封三年，乘平西南夷之威，遣從票侯趙破奴率屬國騎及郡兵數萬擊姑師，王恢以輕騎七百人先至，虜樓蘭王，遂破姑師，因舉兵威以困烏孫、大宛之屬，漢遂得由酒泉列亭障至玉門矣。此漢通西域後，對於西域之初次軍事行動也。自此以後，漢與烏孫聯合，以宗女江都翁主妻烏孫王，而收夾擊匈奴之效。初漢使之使安息者，安息亦發使隨與俱來，觀漢廣大，及宛西小國驩潛，大益，宛東姑師、扞罽、蘇薤之屬，皆隨漢使獻見天子，則葱嶺以東各國，均服屬於漢。所謂通西域以斷匈奴之右臂者此也。唯宛以西，自以絕遠，尙驕恣晏然，憑匈奴之勢，未可誦以藩屬之禮。漢爲申大漢之聲威於絕域，威服烏孫、侖頭諸國，不能不從事大宛之征討。太初元年，因大宛之攻殺漢使，掠取財物，即拜李廣利爲貳師將軍，發屬國六千騎及郡國惡少年數萬人以伐大宛。適以兵少飢疲，爲郁成所敗。太初二年，復出兵伐宛，益發惡少年及邊騎，出敦煌者六萬人，負私從者不與。益發戍卒十八萬築居延、休屠以衛酒泉。又發天下七科謫，載糒給貳師轉車人徒相連屬至敦煌。於是貳師得以屠侖台、破宛城、擒殺郁成王。漢復發使十餘輩，至宛西各國，風以伐宛之威德。於是西域震懼，多遣使來貢獻。漢遂自敦煌西至鹽澤，往往起亭，而侖台、渠犂皆有田卒數百人，置使者校尉領護，以給使外國者。此漢第二次出兵西域之經過也。